

Su Droga...Mi Droga

E situashon di droga na nos isla ta alarmante! Awor ku tin mas vuelo di KLM, mas ku nunca e maldishon aki ta asotá Boneiru. Tin poko famia ku e epidemia narkótiko no ta afektá di un òf otro manera. Awor habitantenan di nos mes pid’í baranka ta den servisio di e narkotrafikante, algu ku poko aña pasá nos no por a imaginá ku hende di sano huisio lo hasi... Awor hopi bes e mula no ta stranhero; ta hende di abla Papiamento.

Ta parse ku droga ta skeiru tur kaminda: na skol, na trabou, riba kaya, den famia. Tin desakuerdo kua bario t’esun ku mester keda koroná komo “bario di droga”. Ta Antriol? Rincon? Òf Nort Saliña ta kapital narkótiko di Boneiru? Nos ta ku man na kabes, desesperá pa haña solushon.

Ma laga nos ta sinsero. Di bèrdat bo ke un solushon? **Hopi hende tin ménos interes pa haña solushon pa droga ku nan ta pretendé! E preis personal ta muchu karu pa nan paga!**

Kiko mi kier men? Estudionan ta muestra kla ku mayornan ku ta avisá nan yunan kontra e uso di droga i ta duna un bon ehèmpel tin muchu ménos problema ku droga den nan famia. En general, e mayor su instrukshon i atvertensianan kontra e uso di droga ta logra su meta; e hóben no ta purb’é. Ma estudionan tambe ta demonstrá ku e chèns ta hopi grandi ku e hóben lo eksperimentá ku supstansia ilegal si un òf mas di su mayornan ta usa droga. Esei ta lógiko! Maske e mayor por prohibí su yu di purba droga, e tòg ta promové su uso dor di su akshonnan.

T’aki hopi mayor; pasobra **alkohòl i tabako ta droganan!** Djis pasobra nan ta legal, no ta hasi nan korekto. Nos tur ta bisa nos ta kontra droga, ma nos ta hasi otro. Nos ta importá konteinernan yen yen di e droganan aki! Nos no por imaginá un evento, deporte, selebrashon sin nos droga...anto demasiado!

Ki hipokresia! Nos ta kondená drogadiktonan. Ma ki dia lo bo realisá **ku prevenshon di droga ta kuminsa ku abo mes!** Ki dia lo bo kompéndé ku bo tin ku trata ku BO uso di droga promé? Ki dia lo bo realisá ku bo no por prediká “Djis bisa nò na droga” ora bo mes ta bisa “Si” na bo droga?

E dianan aki, hopi hende na nos isla ta krepchi pasobra nan no por haña e droga na kua nan ta adikto, Polar. Ma e mesun hende lo bira mas ku krepchi—razu mes—si nan yu ta usa droga. Hipokresia! Un stèndert dòbel...hanchu pa mi, smal pa bo!

Si di bèrdat bo ke kombati droga bo tin ku kuminsá ku bo mes, poniendo stèndertnan dòbel un banda. Si bo ta kontra uso di droga, stòp di usa BO droga: stòp di bebe, stòp di huma. Bo tin nada di bisa tanten bo ta mará na bo bòter. Bo ta gasta bo rosea pornada ora bo ta kondenáesun ku ta huma porkeria, ma abo no por deshásí di bo paki di Marlboro. **Bo ta komuniká, “Bo droga ta malu, mi droga si ta bon!”** Ki hipokresia!

Bo por hasi hopi pa prevení bo yu ta bira adikto dor di bo ehèmpel. Si abo, no tin dominio propio pa ku bo bisio, no kere ku bo yu lo sali mihó ku bo. Blachi no ta kai leu di palu. Bo no por eksigí pa bo yunan hasi loke bo no ta despuesto di hasi. **Bo** ta siña nan ku e mihó solushon pa un problema ta un beter. **Bo** ta siña nan pa drispidí bo sèn pa un serbes tras di otro. **Bo** ta siña nan usa droga! Ta di straña ku bo yunan, **siguiendo bo ehèmpel**, ta usa droga?

E problema di droga lo no desparesé den un será di wowo si mayornan kuminsá duna un bon ehèmpel. E problema ta muchu mas kompliká. Ma bo ta komediante so si bo no ta evaluá bo mes. “*Abo, ku ta siña un otro, bo no ta siña bo mes? Abo ku ta prediká ku un hende no mester hòrta, bo mes ta hòrta? Abo ku ta bisa ku hende no mester kometé adulterio, bo mes ta kometé adulterio?*” (Romanonan 2:21-22). Nos no por gana e guera kontra droga mientras nos ta tene firme na dos stèndert, un pa su droga, i un otro stèndert pa mi droga.